開放文學 - 歷代筆記 - 夜雨秋燈錄 丹青奇術

院人鮑打滾,畫師也,能召亡寫真。雖逝者逾□餘載,鮑往墓上伏地一滾,瞑目久之,起則把筆勾勒,敷色渲染,舉示其子孫戚屬,無不驚為酷肖。人子思慕之極,不能重見容範,多樂與鮑游,以故倒屣爭迎,聲價頗重。一領皂色大布衫,敝猶衣之,蓋滾久無從收拾也。然得資多供纏頭費,尤嗜酒不羈,為君子所嫉。 皖北有謝君,父早歿,其兄以微員仕都中。偶晤鮑,邀至家,囑為其父傳神。鮑如法寫就,神頗似,惟頷下有八字紅血跡,不可解。詢於母,蓋其父曾因公收刑部獄,懼法,自以黑索扼吭死,故有此跡。睹其顛冠藍頂,其父生固八品者,不可解。次日其兄書來,已為太翁覃恩加級,請三品封矣。

興化有陳孝子,名嘉謨,國初時,增廣生員。其父某,與鹺商爭海地,興訟;商負,銜之。會其父往海濱,商嗾灶丁毆之,自 踢其子死,告於官。往驗,迳誣為其父踢殺。訟兩年,商遍賄當道,遂以生父為把持鹽務,毆殺人命,擬斬。生號訴諸大府,不 直,欲叩閽,知秋決近,恐不及,禱於神,不應。日夜仰天泣,目盡腫。聞巡按御史將至揚,急於神前,刺血寫冤狀二通,一藏於 懷,一捧於手,油紙封固而標題之。文甚長,皆歷訴商橫吏貪,父抱黑盆等語。末有:「與其父死而兒亦死曷若兒先死,而父可或 生」兩語,尤為酸鼻。書成,公服立河畔。俟巡按官舫鳴鉦鼓樂從上流下,兩岸有司跪接,生乘其不備,突於人叢中躍出,大聲呼 冤。攤手中狀於官舫,自投長河死。巡按懸賞募撈救,大索三日,不能得;撈出瓜州口,亦無耗。

翌晨,巡按素服親祭於浮橋口。風大作,日色慘淡,眾見水面豎一指出,蓋屍猶直立逆流中。負出水,面如生,握拳透爪,切齒穿齦。置於岸,僵立不仆。巡按親許代昭雪,始仆。閱懷中狀詞,瑣而更哀。立刻坐堂皇,提人證,審訊刑求。商服,遂斬商,而出生父於獄。諭本籍邑宰,善視生父,厚殮生屍。然後奏劾上下承審官,請旌孝子,祀入鄉賢,刊事跡入邑乘。詔許,邑人建祠於學宮西隅,春秋官祭私祭禮不衰。

至道光某甲子,適鮑君來,邑人痛孝子無遺像,求寫真。鮑以為事隔百年,難之。邑人請益堅,乃試往殯宮,滾五次,不可得。恐損己名,自剪爪髮,刺血書疏文,雜符■,焚於城隍神祠,跪拜禹步,久之,懷紙筆就神座下宿,囑廟祝無窺探。

漏三下,萬籟寂,見龕燈頓縮,階下若人影,往來甚伙。兩廊各出一卒,一長如山魈,一短如僬僥,互揖出門去。少時,聞析聲鼓聲,請鑰開門聲,四褐衣人來,伏階下,白有詞。即見案上設符劍印信,階下多執戟横刀,若大府體。樂三奏,神金冠蟒服,呵殿出,升堂坐。貌古髯濃,鬢已斑白。判事畢,問褐衣人,曰:「孝子來何遲。」曰:「孝子現為崆峒山都總管,雲程尚二千里耳。」

須臾,鼓樂大震,列炬如火,城吏白:「孝子到!」神供僂出迎,禮甚恭,肅入,分東西坐。孝子冠服甚都,貌亦豐潤。寒暄若已,神敬白鄉人意與畫士疏。孝子顰蹙曰:「何必爾?」神曰:「鄉梓情深,欲求音容,為後學榘,俾瞻仰耳。」一朱衣吏,請入西廂更衣,少時,復就坐,則衣公服,烏靴露頂,貌極清臞。少定,即更來時服,再拜興辭。神皇皇送之登輿去,三揖而返。燈光大放,滿堂寂然。鮑驀如夢醒,即抽毫就燈寫就。天明舉示人,與孝子曾孫骨氣同,鮑未面也。惟首無帽,頸無領。蓋國初時,公服上以尺布圍頸,投波時領與帽飄去,故冥冥現形,猶貌當年精衛,由是人益神其術。

後與揚州營李游擊善。李有雛婢小玉,與孌童施姓私通,李見而怒叱之。兩小私遁,覓無跡,急延鮑,恐之曰:「君有術,必能知渠所在。如言之確,當酬以重金,若不語,當以妖法收汝獄。」鮑不得已,勉為一滾,即伸紙遣墨,畫長堤淺水,疏柳數行,一漁家,門首曬罾,屋後有覆艇,微露男女足。李遣役照圖捕,果獲。略審詰,雙雙活瘞之。鮑持金急遁,走儀徵,將渡江,夜從蕩婦宿。甫登榻,見婢與僕,相摟自帷後出,笑而招以手,鮑大呼,陽脫,死於婦腹上。

懊儂氏曰:身有絕技,不知斂藏,猶賈禍患。弄怒潮者必溺斃,戲竿杪者終墜亡。況明明邪教,且攫金而賣命者乎?死婦腹上,猶便易渠。至孝子風采,如旭日之當空,如朝霞之映海,英風凛凛,千載如生,固無日不在人心目間;乞渠寫真,本為多事。